



CONVENIO ENTRE O INSTITUTO GALEGO DE PROMOCIÓN ECONÓMICA E A ASOCIACIÓN CLÚSTER DA FUNCIÓN LOXÍSTICA DE GALICIA PARA A EXECUCIÓN DE ACTIVIDADES DA ESTRATEXIA INTEGRAL DE OPTIMIZACIÓN LOXÍSTICA DE GALICIA

Dunha parte, Covadonga Toca Carús, en nome e representación do Instituto Galego de Promoción Económica (en diante, Igape), con NIF Q6550010J e domicilio en Edificio Igape, Complexo Administrativo San Lázaro s/n, 15707 Santiago de Compostela, na súa calidade de directora xeral. Está facultada para este acto en virtude da delegación de facultades recollida na Resolución do 18 de setembro de 2023 (DOG núm. 184, do 27 de setembro de 2023).

Doutra parte, Xoán Martínez Reboredo, en nome e representación da Asociación Clúster da Función Loxística de Galicia (en adiante, CFLOX), con NIF G94194594 e domicilio en Edificio CEM, Cidade da Cultura de Galicia, Monte Gaiás, s/n, 15707 Santiago de Compostela. Comparece na súa calidade de presidente da devandita asociación, en virtude da acta fundacional de data 30 de xullo de 2019.

Interveñen en función dos seus respectivos cargos e no exercicio das facultades que, para convir en nome das entidades que representan, teñen conferidas e,

EXPOÑEN

I. Que o Igape é a Axencia de Desenvolvemento Rexional de Galicia, e entre as súas funcións están a promoción, fomento e potenciación de actividades económicas que favorezan o desenvolvemento equilibrado e integrado tanto en termos sectoriais coma territoriais.

II. Que a Axenda da Competitividade Galicia Industria 4.0 tivo como un dos seus enfoques estratéxicos o da potenciación de infraestruturas e loxística. A partir deste enfoque desenvolveuse a Estratexia Integral de Optimización Loxística de Galicia (EIOLOG no sucesivo), con 15 programas agrupados en tres obxectivos estratéxicos. A EIOLOG promove, para a súa execución, a coordinación e cooperación entre o sector público e privado, e desenvolveuse a partir dun proceso participativo que incluíu aos axentes e empresas relevantes na alí denominada "función loxística" de Galicia: administración, xestores de infraestruturas e nodos loxísticos, operadores loxísticos e empresas dos sectores estratéxicos da economía galega con amplo uso de loxística.

III. Que o Igape e o CFLOX forman ambos parte do consorcio para o programa de cooperación interterritorial POCTEP denominado *"Digital Co-Listics: Impulso da actividade loxística no territorio Galicia-Norte de Portugal a través da potenciación das capacidades organizativas e tecnolóxicas do sistema loxístico Galicia-Norte de Portugal, para o fomento da internacionalización e incremento da presenza exterior das empresas dos ámbitos da loxística e de transporte"*. Este proxecto reforza a viabilidade da execución da EIOLOG, posto que as actividades propostas están baseadas nesta Estratexia. Deste xeito, estase ante unha importante oportunidade de configurar unha efectiva colaboración co tecido industrial de Galicia que acompañe as actividades que ven realizando o consorcio Digital Co-Logistics.

IV. Que o CFLOX é unha asociación empresarial galega sen ánimo de lucro, cuxa misión é contribuír a unha maior eficiencia da función loxística de Galicia, promovendo a súa competitividade, cunha especial atención á innovación e a internacionalización das empresas que forman parte da súa cadea de valor. A agrupación industrial unirá esforzos e intereses de forma colectiva e transversal, para lograr que Galicia se sitúe como un polo loxístico de referencia global. A dita asociación parte dos grupos de traballo creados para



o deseño da EIOLOG, e en consonancia está completamente aliñada cos obxectivos da mesma. O CFLOX é unha agrupación industrial aberta e participativa, coa vocación de aunar os esforzos dos prestadores de servizos de transporte e loxística e das empresas demandantes destes servizos. Unha agrupación industrial transversal acorde á crecente relevancia da loxística como elemento fundamental de competitividade empresarial e territorial.

Que o IGAPE e o CFLOX asinaron xa dous convenios de colaboración 2019-2021 e 2022-2024 que permitiron levar adiante boa parte dos retos e proxectos previstos na EIOLOG a través dunha auténtica colaboración público-privada. Entre os seus logros máis salientables figuran:

CREACIÓN DE COMUNIDADE LOXÍSTICA:

- **Constitución dunha comunidade loxística** con representantes de todos os eslabóns da cadea (loxísticas, cargadoras, fabricantes, consultoras, centros de coñecemento e autoridades portuarias) facilitando o contacto entre empresas con intereses comúns e que ata o momento non o tiñan.
- **Creación da Galicia Logistics Academy** que busca formadores e financiamento para ofrecer formación especializada para as empresas galegas.
- **Seguimento e posicionamento constante** nas cuestións relevantes para a función loxística de Galicia con especial atención ás infraestruturas viarias e ferroviarias, co Corredor Atlántico Europeo como máximo expoñente.

PROMOCIÓN INTERNACIONAL:

- Participación presentando ao conxunto de Galicia en **feiras internacionais** en Barcelona (2), Munich, Madrid (2) e Vigo (2).
- Creación e promoción da **marca Galicia Logistics_Atlantic Gate**.
- **Misións internacionais** con EEUU, Reino Unido, Marrocos, Angola.

ESTUDOS DE CONECTIVIDADE:

- **Mapeo da conectividade internacional** de Galicia (estudo [aquí](#)).
- **Identificación de mercados potenciais** de maior interese (análises [xeral](#) e [nafta](#)).
- Análise de viabilidade e deseño de estratexia para unha **conectividade marítima directa Galicia – EEUU** (estudo [aquí](#)).

INNOVACIÓN:

- Certificación como **agrupación empresarial innovadora** e promoción de 5 proxectos AEI.
- **Base de datos de fluxos de import-export** de España con detalle de produtos, modo de transporte, incoterm... ([exemplo](#))
- Análise de situación e **necesidades de dixitalización** da loxística galega así como difusión de proxectos en marcha e experiencias de éxito ([documentos](#))..
- **Seguimento das capacidades e intereses de innovación** loxística das principais empresas de Galicia.

XERACIÓN DE INFORMACIÓN:

- Estudo de necesidade e viabilidade de **aparcamentos seguros para transporte pesado** e promoción da creación dunha rede galega ([estudo](#)).
- Análise de puntos fortes e débiles de **Galicia como espazo loxístico** ([estudo](#)).

- Estudo sobre a importancia real da **función loxística na economía de Galicia** ([estudo](#)).

DISTRIBUCIÓN URBANA DE MERCADORÍAS:

- Análise de **principais tendencias europeas** en distribución urbana de mercadorías ([estudo](#)).
- **Acompañamento ás corporacións das cidades** galegas no deseño da mobilidade urbana.
- Impulso a **proxectos innovadores de DUM**.

V. Que para continuar afondando na labor de CFLOX e Igape para os seguintes dous anos constrúese o novo convenio, en esencia, a partir da execución de máis actividades que forman parte da Estratexia Integral de Optimización Loxística, o cal o converte ao acordo de asociación que se articula no presente convenio na vía única e directa de acadar os obxectivos de colaboración necesarios para seguir executando os diversos plans da EIOLOG, de cara a incrementar a competitividade de Galicia a través da mellora e crecemento da función loxística.

VI. Por outra parte, o novo período de colaboración seguirá contribuíndo ao fortalecemento do Clúster, cuxa vocación é ser o punto de encontro dos diversos axentes da función loxística de cara á concertación de proxectos de colaboración intersectoriais, o favorecemento da conectividade exterior da industria galega e o mantemento da competitividade das infraestruturas de Galicia con respecto a outras rexións.

Tendo en conta estas consideracións, o Igape e CFLOX levarán a cabo, de forma conxunta, a realización de novas actividades cara a continuar na senda da mellora da función loxística no territorio galego. Por todo iso, CFLOX e o Igape están interesados en colaborar para a consecución dos obxectivos comúns nas materias ás que se fai mención nos expositivos precedentes e, para ese efecto, subscriben o presente convenio de acordo coas seguintes

CLÁUSULAS

PRIMEIRA. OBXECTO

Constitúe o obxecto do presente convenio a colaboración entre as partes para a consecución dos obxectivos comúns de desenvolvemento e mellora da función loxística en Galicia.

Para tal fin, desenvolveranse actividades nos seguintes ámbitos de traballo:

- Plan de comunicación e promoción internacional do sistema loxístico galego.
- Promoción exterior da oferta de solo industrial.
- Celebración de eventos sobre loxística internacional.
- Sensibilización e promoción da innovación no sector loxístico.
- Análise da eficiencia medioambiental da loxística galega.
- Impulso á acción do clúster da función loxística.
- Colaboración coa Secretaría Xeral de Industria para elaborar o Plan Director da Loxística industrial de Galicia

Os obxectivos detallados de actuación ao abeiro do presente convenio figuran no resto de cláusulas.



SEGUNDA. XUSTIFICACIÓN DA UTILIZACIÓN DA FIGURA DO CONVENIO

Motívase a utilización da figura do convenio dada a especificidade e as características que se dan na entidade Clúster da Función Loxística de Galicia, cuxa creación foi impulsada pola propia Xunta de Galicia e cuxos obxectivos principais coinciden coas iniciativas e proxectos da Estratexia Integral de Optimización Loxística de Galicia elaborada pola Xunta de Galicia e xestionada polo Igape e configúrase coma unha entidade sen ánimo de lucro, aberta á participación dos axentes que compartan os seus fins.

Esa especificidade singular e incomparable, xunto coa experiencia, preparación especializada e os propios medios da entidade, implican vantaxes e sinerxías así como a axeitada dinámica e axilidade para o Igape ao manter unha relación colaborativa fluída, eficiente e sinérxica cun só actor.

Por outra banda, mediante este convenio o Igape non encomenda unha xestión de servizos a CFLOX, senón que expón un marco de colaboración no que une as dúas experiencias e eidos de competencias de cadaquén para conseguir fins comúns de interese público como son os de desenvolver un sistema loxístico galego competitivo, que impulse a acción exterior do tecido produtivo galego e dea resposta aos retos derivados da internacionalización das cadeas de subministro, dos procesos globais de relocalización industrial, do cambio tecnolóxico e das novas pautas e tendencias de consumo. Esta é a canle axeitada, rigorosa e segura a través da colaboración leal e profesional entre os asinantes.

É esta idea de colaboración na consecución do fin común de capacitación directiva do tecido produtivo galego a que fundamenta a subscripción deste instrumento.

TERCEIRA. ACTUACIÓNS CONXUNTAS DO CONVENIO

As actuacións que ambas partes consideran oportuno xestionar a través do presente convenio materializaranse durante os anos 2024, 2025 e 2026, dando nalgúns casos continuidade a actuacións xa iniciadas e poñendo en marcha outras, agrupadas nas seguintes actividades, recollidas nos Programas da propia EIOLOG:

- **Acción 8.1.** Plan de comunicación e promoción internacional do sistema loxístico galego.
- **Acción 9.2.** Promoción exterior da oferta de solo industrial.
- **Acción 3.2** Follas de ruta do fortalecemento das cadeas de valor globais dos sectores estratéxicos galegos.
- **Acción 4.1.** Sensibilización e promoción da innovación no sector loxístico.
- **Acción 7.1.** Análise da eficiencia medioambiental da loxística galega.
- **Acción 15.3.** Impulso á acción do Clúster da Función Loxística.
- **Colaboración coa Secretaría Xeral de Industria para elaborar o Plan Director da Loxística industrial de Galicia.**

O CFLOX e o Igape, dentro do Comité de Seguimento establecerán as actividades a realizar e o seu contido, dentro das marxes económicas das actividades elixibles, cuxo orzamento aparece no Anexo I: Memoria Económica. Trátase deste xeito de dar á iniciativa privada a máxima flexibilidade para planificar as actividades que poidan concitar un maior interese, ao tempo que se mantén un marco orzamentario disciplinado.



Para considerar unha execución satisfactoria do convenio deberase acadar polo menos un 51% de execución orzamentaria mediante execución de actividades asignadas polo Comité de Seguimento.

As partes poderán, de xeito consensuado, organizar actividades a maiores ao abeiro deste convenio, sempre que se manteñan os obxectivos globais e non se incremente a aportación do Igape.

CUARTA. GASTOS ATENDIBLES

Con carácter xeral, considéranse gastos atendibles para os efectos do convenio, aqueles que de xeito indubidable responden á natureza das actividades e fins do convenio.

Requisitos dos gastos con cargo ao convenio:

1. Os gastos deberán ser realizados e efectivamente pagados dentro do ámbito temporal do propio convenio e, polo tanto, no que atinxe unicamente a actuacións realizadas a partir da data da sinatura do convenio e ata dous anos despois.
2. O importe do IVE (Imposto do Valor Engadido) non se considerará gasto xustificable cando sexa susceptible de recuperación ou compensación. Con todo o anterior, o IVE vinculado aos gastos elixibles, terá tamén a consideración de gasto elixible se a entidade acredita a súa exención expresa mediante certificación ao respecto da AEAT ou que tendo pagado o IVE, este non é susceptible de recuperación ou compensación ningunha por parte da entidade. Esta acreditación farase mediante Certificado de Situación Censual expedido pola AEAT no cal se poña de manifesto que a entidade non realiza declaracións, liquidacións ou autoliquidacións deste imposto, acompañado de certificado da AEAT de que se atopa ao corrente das súas obrigacións tributarias, ambos a data de peche da correspondente certificación de gastos. Unha vez pechado o exercicio poderáselle requirir certificación de AEAT que acredite que non presentou a Declaración Anual do Imposto sobre o Valor Engadido.
3. Cando o importe do gasto externo sexa igual ou superior a 15.000 € + IVE, CFLOX deberá solicitar como mínimo tres ofertas de diferentes provedores sen que entre eles poida existir vínculo societario, laboral ou de calquera índole de dependencia, con carácter previo á contratación do compromiso para a prestación do servizo ou a entrega do ben, agás que polas especiais características dos gastos non exista no mercado suficiente número de entidades que o subministren ou presten. No suposto mencionado anteriormente, a elección entre as ofertas presentadas, que deberán achegarse na xustificación, realizarase conforme a criterios de eficiencia e economía, debendo xustificarse expresamente nunha memoria a elección cando non recaia na proposta económica máis vantaxosa. Asemade en calquera de ámbolos supostos precisárase polo menos a aprobación ex ante do Igape deses gastos e ulterior xustificación e ratificación no Comité de Seguimento do convenio.
4. Todos os gastos externos xustificadas por CFLOX deben axustarse a prezos de mercado, polo que podería solicitarse unha auditoría sobre os gastos xustificadas, no caso de que non exista outro patrón de público coñecemento que permita establecer o dito axuste.
5. O Igape farase cargo dun máximo dun 90% dos gastos totais atendibles das actividades obxecto do convenio, correspondendo o 10% restante á achega de CFLOX.

Os gastos clasificaranse en:

- a) Gastos de persoal do CFLOX, en base a nóminas pagadas, gasto de seguridade social e importes retidos en concepto de IRPF, e certificado de dedicación ao proxecto.



- b) Gastos externos de contratación de servizos.
- c) Gastos externos de publicidade e marketing das actividades.
- d) Gastos xerais do CFLOX, que non superarán o 8% dos gastos xustificandos.
- e) Outros gastos que respondan indubidablemente á realización das actividades e fins do convenio, e que non superarán o 30% dos gastos totais xustificandos.

QUINTA. COMPROMISOS DO IGAPE

Para a realización das actuacións obxecto do presente convenio o Igape contribuirá cun máximo de 443.700 € € con cargo á partida orzamentaria 09.A1.741A.6403 para os anos 2024, 2025 e 2026 (Proxecto 2018 00001 – “Gobernanza estratéxica de loxística”). O anexo I “Memoria Económica” detalla a aplicación desta achega.

Partida Orzamentaria	2024	2025	2026	Total
09.A1.741A.6403	180.000 €	195.000 €	68.700 €	443.700 €

CFLOX carece de ánimo de lucro na realización das actuacións obxecto do convenio, polo que a contribución pecuniaria responde a unha compensación dos gastos que terán que soportar de cara a lograr a efectividade e execución do convenio.

- ❖ Igape comprométese a colaborar e, se é o caso, dar o visto e prace das actuacións presentadas a través da Comisión de Seguimento prevista na cláusula novena sobre as propostas realizadas por CFLOX.
- ❖ Asemade, deberá especificar a participación nas actividades públicas ao abeiro do convenio dos representantes da Xunta de Galicia, das súas Consellerías ou departamentos e do propio Igape, cunha antelación mínima de 10 días naturais antes da data prevista de celebración.
- ❖ No marco desta colaboración, o Igape difundirá o proxecto a través das canles que, estando ao seu alcance, considere oportunos.

SEXTA. COMPROMISOS DE CFLOX

- ❖ CFLOX responsabilízase de organizar as actuacións da cláusula terceira, na súa totalidade, en estreita colaboración co Igape, acordando co Igape todos os aspectos organizativos, e contribuíndo economicamente -en especie ou en metálico- ás actividades tal e como se describe no Anexo I (memoria económica).
- ❖ CFLOX será responsable da difusión e impulso da súa actividade, coa finalidade de reforzar o funcionamento da organización clúster mediante a captación de novos socios e o aseguranza da súa participación nas actividades colaborativas que se organicen.
- ❖ CFLOX difundirá a colaboración do Igape en todas as manifestacións públicas que realice.

SÉTIMA. PAGAMENTO DA CONTRIBUCIÓN DO IGAPE

A contribución do Igape será aboada unha vez solicitado o pagamento mediante a presentación de certificacións de gastos de CFLOX comprensiva dos gastos incorridos e a correspondente documentación xustificativa, que serán presentadas de forma acompañada coa execución, e non máis dunha vez ao mes. Os pagamentos a conta estarán suxeitos ao cumprimento de obxectivos parciais do convenio que se xustificarán mediante informe das actuacións realizadas que acredite o dito cumprimento, ademais dos documentos xustificativos dos gastos que se describen máis adiante nesta cláusula. A data límite de xustificación para cada unha das anualidades do convenio será o 30 de novembro dese ano.



A xustificación correspondente ao derradeiro pagamento do convenio deberá, en todo caso, presentarse non máis tarde do 30 de abril do ano de finalización do convenio 2026.

As liquidacións presentaranse vía electrónica, na oficina virtual do Igape na páxina <https://www.igape.gal/gl/oficinavirtual>, en particular a través do código de procedemento PE001, achegando as copias dixitalizadas da documentación que se relacionan a continuación.

CFLOX responsabilizarase da veracidade dos documentos que presenten.

A liquidación estará integrada por:

1. Certificación do gasto, segundo o modelo do Anexo II: certificación comprensiva da relación clasificada dos gastos presentados para cada actuación, con identificación do acreedor e do documento, o seu importe, a data de emisión e a data de pagamento e mediante a cal se solicita o pagamento.
2. Informe das actuacións realizadas ata o momento.
3. Declaración responsable da titularidade da conta bancaria onde se debe realizar o pagamento, incluída no Anexo II.
4. Declaración responsable da persoa que asina a solicitude, en representación do organismo, de que a documentación que se presenta en copias constitúen unha reprodución exacta dos orixinais, os cales lle poderán ser requiridos polo Igape, incluída no Anexo II. Excepcionalmente, cando existan dúbidas derivadas da calidade da copia, o Igape poderá solicitar de maneira motivada o cotexo das copias achegadas polo interesado para o cal se lle poderá requirir a exhibición do documento orixinal.
5. Certificacións expedidas polas respectivas Administracións Públicas, que acrediten que se está ao corrente das obrigas tributarias e da Seguridade Social, así como a acreditación de non ter pendente de pagamento ningunha outra débeda, por ningún concepto, coa Administración Pública da Comunidade Autónoma ou autorización para que a Xerencia do Igape realice estas consultas polos seus propios medios. De acordo coa cláusula 14 deste convenio, CFLOX autoriza a realización desta petición.
6. Documentación xustificativa da realización e pagamento do 100% do custo das actividades realizadas:

❖ Gastos de persoal:

- Certificado de dedicación emitido por CFLOX, deixando constancia documental das horas efectivamente consumidas polos traballadores/as imputables ao proxecto, en documento asinado polo responsable da entidade e a persoa empregada.
- Nóminas pagadas e xustificante do seu pagamento.
- Seguridade social do período que se alega: Documento/s de Relación nominal de traballadores e Documento/s de Cálculo da Liquidación e os correspondentes xustificante/s de pagamento.
- Importes retidos IRPF do período que se alega: Modelo/s 111 e os correspondente/s xustificante/s do seu ingreso na AEAT.

❖ Gastos externos: xustificación dos gastos externos mediante facturas ou documentos de valor probatorio equivalente no tráfico xurídico mercantil ou con eficacia administrativa incorporados na relación a que se fai referencia



no punto anterior e xustificante bancario do seu pagamento. Deberase entregar declaración expresa de que as persoas ou entidades subcontratadas para as actividades obxecto da colaboración non teñen vinculación societaria empresarial co organismo que realiza a contratación.

- ❖ Para a consideración do IVE como gasto atendible, de ser o caso:
 - No caso de estar exento do imposto sobre o valor engadido (IVE): Certificación da AEAT de exención do IVE ou
 - Se tendo pagado o IVE, este non é susceptible de recuperación ou compensación ningunha por parte da entidade: Certificado de Situación Censual expedido por AEAT na cal se poña de manifesto que a entidade non realiza declaracións, liquidacións ou autoliquidacións deste imposto acompañado de certificado da AEAT de que se atopa ao corrente das súas obrigacións tributarias, ambos a data de peche da correspondente certificación de gastos. Unha vez pechado o exercicio poderáselle requirir certificación de AEAT que acredite que non presentou a Declaración Anual do Imposto sobre o Valor Engadido.

7. Calquera outra documentación ou material que a persoa beneficiaria considere necesaria presentar para unha mellor xustificación das actuacións obxecto do presente convenio

Requisitos:

- Xustificación dos pagamentos: transferencia bancaria, certificación bancaria orixinal ou extracto de pagamento. Non se admitirán os pagamentos en efectivo.
- Os gastos deben estar realizados dentro do prazo de vixencia do convenio que finaliza o 30 de abril de 2026.

O Igape abonará a CFLOX o 90% dos custos xustificados, cos límites do Anexo I.

Considerarase unha execución deficiente do convenio aquela que non acade un 51% de execución do convenio. Neste caso, resolverase o convenio e CFLOX deberá reintegrar, se é o caso, as cantidades xa percibidas pola execución parcial do mesmo.

CFLOX manterá a disposición do Igape ou de calquera organismo público con capacidade de fiscalización da Comunidade Autónoma de Galicia, tales como Intervención Xeral, o Tribunal de Contas e o Consello de Contas, todos os xustificantes dos gastos e ingresos obtidos para o fin dunha verificación *in situ*, ben por medios propios ou mediante auditor externo.

OITAVA. VIXENCIA

Establécese como prazo de vixencia desde a data de sinatura do convenio ata o 30 de abril de 2026, momento no que deberán estar realizadas todas as actuacións programadas ao abeiro do convenio. O convenio poderá ser prorrogado, previo acordo das partes, por un período máximo de oito meses, co obxecto de realizar as actividades e acadar os obxectivos, sempre que non implique un incremento na achega económica do Igape.

O convenio extinguirase polo cumprimento das actuacións que constitúen o seu obxecto ou por incorrer en causa de resolución.

Son causas de resolución:

- a) O transcurso prazo de vixencia do convenio sen terse acordado a súa prórroga.
- b) O acordo unánime de todos os asinantes.



- c) O incumprimento das obrigas e compromisos asumidos por parte dalgún dos asinantes. Neste caso, calquera das partes poderá notificar á parte incumpridora un requirimento para que cumpra nun prazo de 10 días hábiles coas obrigas ou compromisos que se consideran incumpridos. Este requirimento será comunicado á Comisión de Seguimento do convenio e ás demais partes asinantes. Se transcorrido o prazo indicado no requirimento persistira o incumprimento, a parte que o dirixiu notificará ás partes asinantes a concorrencia da causa de resolución e entenderase resolto o convenio.
- d) Por decisión xudicial declaratoria da nulidade do convenio.
- e) Por calquera outra causa distinta das anteriores prevista no convenio ou noutras leis.

Se cando concorran calquera das causas de resolución do convenio existen actuacións en curso de execución, as partes, a proposta da Comisión de Seguimento do convenio, poderán acordar a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a súa liquidación.

NOVENA. COMISIÓN DE SEGUIMIENTO

Para velar polo cumprimento do estipulado, constituirase una Comisión Mixta de Seguimento da execución do convenio, formada por dous representantes do Igape e dous de CFLOX, que se reunirá regularmente unha vez cada trimestre en sesións ordinarias e a petición dunha das partes se se deseen circunstancias extraordinarias que así o aconsellaran. A citada Comisión estará presidida por un dos representantes do Igape que terá voto de calidade, agás en decisións de adxudicación ou contratación que impliquen condicións gravosas para CFLOX que se tomarán por unanimidade. Asistirá sen voto un técnico para levantar acta das sesións. Asemade, tamén sen voto, poderá asistir ás reunións da Comisión o persoal de apoio aos representantes das entidades que se consideren convenientes.

Esta Comisión actuará como órgano de vixilancia, seguimento e control do establecido neste convenio.

O funcionamento da Comisión de Seguimento farase ao abeiro do réxime xurídico dos órganos colexiados contido na sección III, co capítulo I do título I (artigos 15 e seguintes) da Lei 16/2010, do 17 de decembro, de organización e funcionamento da Administración Xeral e do sector público autonómico de Galicia.

DÉCIMA. MODIFICACIÓNS

O presente convenio poderá ser obxecto de modificación cando teña como finalidade o logro dos obxectivos de estabilidade orzamentaria e sustentabilidade financeira. A devandita modificación terá por obxecto a redución do volume das obrigas ou a ampliación do seu prazo de execución.

UNDÉCIMA. PUBLICIDADE

De conformidade co artigo 15 da Lei 1/2016, do 18 de xaneiro, de transparencia e bo goberno e co previsto no Decreto 126/2006, do 20 de xullo, polo que se regula o Rexistro de Convenios da Xunta de Galicia, o Igape e a Consellería de Economía e Industria publicarán no *Diario Oficial de Galicia* e na súa páxina web oficial o importe da contribución económica ao amparo deste convenio e a entidade destinataria desta; e incluírá igualmente a referida contribución e as sancións que como consecuencia desta puidesen impoñerse nos



correspondentes rexistros públicos, polo que a sinatura do convenio leva implícita a autorización para o tratamento necesario dos datos da entidade e a referida publicidade, así como a súa cesión por parte do Igape aos órganos competentes da Consellería de Economía e Industria.

CFLOX deberá subministrar toda a información necesaria para que o Igape poida dar cumprimento ás obrigas previstas no Título I da Lei 1/2016, do 18 de xaneiro, de transparencia e bo goberno. As consecuencias do incumprimento desta obriga serán as establecidas no artigo 4.4 da citada lei.

DÉCIMO SEGUNDA. PROTECCIÓN DE DATOS DE CARÁCTER PERSOAL

En virtude do disposto no artigo 26 do Regulamento (UE) 2016/679, xeral de protección de datos (RXPd) e na Lei orgánica 3/2018, do 5 de decembro, de protección de datos persoais e garantía dos dereitos dixitais (BOE nº 294, do 6 de decembro), se calquera das partes accede a datos de carácter persoal contidos en ficheiros titularidade de CFLOX, adquiren a condición de encargados do tratamento e comprométense a:

- Non utilizar nin tratar datos de carácter persoal con finalidade distinta á execución deste convenio, non comunicar os datos baixo ningún concepto a terceiras persoas, nin sequera para a súa conservación e, en especial, non reproducir, nin publicar, nin difundir ningunha información acerca dos datos.
- Garantir o cumprimento das medidas de seguridade establecidas, así como a súa correcta implementación.
- Ao termo da relación, por calquera causa, os datos de carácter persoal aos que tivesen tido acceso as restantes partes, deben ser destruídos ou devolverse a CFLOX, incluíndo calquera soporte ou documento.

O incumprimento destas obrigas fai responder ás restantes partes das infraccións que cometa coma se ocupase a posición de responsable do tratamento.

O Igape responde fronte a CFLOX do cumprimento destas obrigas polas persoas que na súa representación participen de calquera modo na execución deste convenio.

DÉCIMO TERCEIRA. RESPONSABILIDADE

A subscrición do presente convenio non implicará relación laboral contractual ou de calquera outro tipo entre os profesionais ou entidades que vaian desenvolver as actuacións obxecto deste convenio e o Igape, de tal xeito que non se poderá esixir a este Instituto responsabilidade ningunha, nin directa nin subsidiariamente, polos actos ou feitos acaecidos no desenvolvemento do devandito convenio.

DÉCIMO CUARTA. AUTORIZACIÓNS

CFLOX consente expresamente a inclusión dos datos relevantes e persoais deste convenio nos rexistros públicos que proceda, de acordo co Decreto 126/2006, do 20 de xullo, polo que se regula o Rexistro de Convenios da Xunta de Galicia, así como poderá exercer os seus dereitos de acceso, rectificación cancelación e oposición respecto do contido dos rexistros antes citados, ante a Dirección Xeral do Instituto Galego de Promoción Económica, sito no complexo administrativo de San Lázaro s/n, 15707 Santiago de Compostela, en aplicación do disposto no Decreto 126/2006.



Este consentimento esténdese á autorización para a cesión dos seus datos á entidade financeira na que se aboe o pagamento, ao *Diario Oficial de Galicia* e ás demais cesións previstas na lei.

Tamén comporta a autorización ao Igape para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda e Administración Pública da Xunta de Galicia. No caso de que se deban presentar estes certificados en fase de emenda, logo de que a consulta polo Igape non obtivese resultado favorable, a data de expedición dos certificados pola Administración correspondente deberá ser posterior á data de consulta polo Igape, o que se comunicará no requirimento de emenda da documentación.

DÉCIMO QUINTA. NATUREZA XURÍDICA

O presente convenio ten natureza xurídico-administrativa, quedando fóra do ámbito de aplicación da Lei 9/2017, do 8 de novembro, de contratos do sector público, de conformidade con seu artigo 6.2, e para calquera cuestión litixiosa que se derive do mesmo, será de aplicación a Lei 29/1998, do 13 de xullo, reguladora da xurisdición contencioso-administrativa.

O convenio rexeráse polas súas propias cláusulas e a interpretación que das mesmas realice a Comisión de Seguimento, así como pola normativa xeral que resulte aplicable.

As partes comprométese a resolver de común acordo calquera controversia que puidese suscitarse sobre a interpretación ou execución deste convenio.

En caso de conflito as partes acordan o sometemento á Xurisdición Contencioso-Administrativa.

DÉCIMO SEXTA. NORMATIVA APLICABLE

Para todo o non previsto neste convenio aplicarase o previsto na Lei 40/2015, do 1 de outubro, de réxime xurídico do sector público, así como na Resolución do 8 de abril de 1991 (DOG nº 82, do 30 de abril) pola que se fai público o acordo do Consello da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, na Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de Convenios da Xunta de Galicia, en todo o que non contradiga a primeira.

E en proba de conformidade, as partes asinan o presente convenio o 6 de maio de 2024.

Polo Instituto Galego de Promoción
Económica

Covadonga Toca Carús

Polo Clúster da Función Loxística de Galicia

Xoán Martínez Reboredo



ANEXO I: MEMORIA ECONÓMICA

Para a realización das actuacións obxecto do presente convenio o Igape contribuirá cun máximo de 443.700 € con cargo á partida orzamentaria 09.A1.741A.6403 para os anos 2024, 2025 e 2026 (Proxecto 2018 00001 – “Gobernanza estratéxica de loxística”).

Partida Orzamentaria	2024	2025	2026	Total
09.A1.741A.6403	180.000 €	195.000 €	68.700 €	443.700 €

O Igape farase cargo dun máximo dun 90% dos gastos totais atendibles das actividades obxecto do convenio, correspondendo o 10% restante á achega de CFLOX.

Os gastos clasificaranse en:

- Gastos de persoal do CFLOX.
- Gastos externos de contratación de servizos.
- Gastos externos de publicidade e marketing das actividades.
- Gastos xerais do CFLOX, que non superarán o 8% dos gastos xustificandos.
- Outros gastos que respondan indubidablemente á realización das actividades e fins do convenio, e que non superarán o 30% dos gastos totais xustificandos.

O escenario inicial de actividades utilizado para fixar o importe do convenio é o seguinte:

PROGRAMA: 8. PROGRAMA DE MELLORA DA VISIBILIDADE MEDIANTE UNHA OFERTA CONXUNTA "GALICIA PLATAFORMA LOXÍSTICA"		128.000 €
Acción 8.1 Plan de comunicación e promoción internacional do sistema loxístico galego		
Actividades principais previstas	Orzamento estimado	
Participación en feiras	98.000 €	
Misións inversas que non encaixen en convocatoria OOII	30.000 €	
PROGRAMA: 9. Promoción de solo industrial en Galicia		150.000 €
Acción 9.2 Promoción exterior da oferta de solo industrial		
Actividades principais previstas	Orzamento estimado	
Base de datos do solo empresarial dispoñible en Galicia	70.000 €	
Estudo de análise de Galicia como territorio loxístico con garantías de continuidade de negocio	80.000 €	
PROGRAMA: 3. INFORMACIÓN E CONECTIVIDADE EXTERIOR DA LOXÍSTICA GALEGA		20.000 €
Acción 3.1 Servizo de información internacional de orixes e destinos dos tráfico galegos		
Acción 3.2 Follas de ruta do fortalecemento das cadeas de valor globais dos sectores estratéxicos galegos		
Actividades principais previstas	Orzamento estimado	
Celebración de eventos sobre loxística internacional	20.000 €	
PROGRAMA: 4. FORTALECEMENTO SECTORIAL E INNOVACIÓN		20.000 €
Acción 4.1 Sensibilización e promoción da innovación no sector loxístico		
Actividades principais previstas	Orzamento estimado	
Comunidade innovación aberta	20.000 €	
PROGRAMA: 7. GALICIA GREEN LOGISTICS		20.000 €
Acción 7.1 Análise da eficiencia medioambiental da loxística galega		
Actividades principais previstas	Orzamento estimado	
Análise e seguimento normativo e propostas de futuro para unha loxística verde.	20.000 €	
PROGRAMA: 15. COORDINACIÓN LOXÍSTICA PERMANENTE		100.000 €
Acción 15.3 Impulso da acción do Clúster da Función Loxística de Galicia		
Actividades principais previstas	Orzamento estimado	
Acción xeral do Clúster	100.000 €	



Colaboración na elaboración Plan Director da Loxística Industrial de Galicia	55.000 €
Actividades principais previstas	Orzamento estimado
Plan Director da Loxística Industrial	55.000 €
TOTAL	493.000 €

Anualización de custos:

Actividades principais previstas	Orzamento anual		
	2024	2025	2026
Participación en feiras	34.708 €	46.140 €	17.152 €
Gastos externos contratación servizos	16.069 €	21.361 €	7.941 €
Outros gastos	16.069 €	21.361 €	7.941 €
Custos indirectos	2.571 €	3.418 €	1.271 €
Misións inversas que non encaixen en convocatoria OOII	10.626 €	14.124 €	5.250 €
Gastos externos contratación servizos	4.919 €	6.539 €	2.431 €
Outros gastos	4.919 €	6.539 €	2.431 €
Custos indirectos	787 €	1.046 €	389 €
Base de datos do solo empresarial dispoñible en Galicia	24.790 €	32.960 €	12.250 €
Gastos externos contratación servizos	22.954 €	30.519 €	11.343 €
Custos indirectos	1.836 €	2.441 €	907 €
Estudo de análise de Galicia como territorio loxístico con garantías de continuidade de negocio	28.334 €	37.666 €	14.000 €
Gastos externos contratación servizos	26.235 €	34.876 €	12.963 €
Custos indirectos	2.099 €	2.790 €	1.037 €
Celebración de eventos sobre loxística internacional	7.375 €	9.231 €	3.394 €
Comunidade innovación aberta	7.375 €	9.231 €	3.394 €
Análise e seguimento normativo e propostas de futuro para unha loxística verde.	7.375 €	9.231 €	3.394 €
Gastos externos contratación servizos	14.340 €	17.949 €	6.599 €
Gastos externos publicidade marketing	6.146 €	7.693 €	2.828 €
Custos indirectos	1.639 €	2.051 €	754 €
Acción xeral do Clúster	35.417 €	47.083 €	17.500 €
Gastos de persoal CFLOX	32.794 €	43.595 €	16.204 €
Custos indirectos	2.623 €	3.488 €	1.296 €
Colaboración na elaboración Plan Director da Loxística Industrial de Galicia	44.000 €	11.000 €	
Analizar a situación do sector e realizar unha proxección da súa posible evolución.	44.000 €		



Facilitar a constitución dunha rede de informantes clave onde terá presenza o sector privado, os representantes dos traballadores, e organismos, e institucións públicas e privadas relacionados co sector loxístico Participar na determinación dos eixos e as liñas xerais, propoñendo uns obxectivos e prioridades sectoriais Apoiar na redacción das medidas concretas que se levarán a cabo durante o período de vixencia do plan			
Contribuír na proposta de selección dos indicadores de seguimento e avaliación Axudar a conformar o marco económico-financeiro no que se enumeran os investimentos necesarios para implantar o plan director		11.000 €	
Gastos externos contratación servizos	40.741 €	10.185 €	
Custos indirectos	3.259 €	815 €	
TOTAL	200.000 €	216.666 €	76.334 €

	2024	2025	2026
Gastos externos contratación servizos	125.258 €	121.429 €	41.276 €
Gastos externos publicidade, marketing	6.146 €	7.693 €	2.828 €
Outros gastos	20.988 €	27.900 €	10.371 €
Gastos de persoal CFLOX	32.794 €	43.595 €	16.204 €
Custos indirectos	14.815 €	16.049 €	5.654 €
	200.000 €	216.666 €	76.334 €

ORZAMENTO	2024	2025	2026	Total
TOTAL	200.000	216.666	76.334	493.000
IGAPE	180.000	195.000	68.700	443.700
CFLOX	20.000	21.666	7.634	49.300

Este escenario inicial de accións poderá priorizarse e modificarse, coa autorización do Comité de Seguimento, dentro dos límites de aportación do Igape que aquí se establecen. Así, dado que o Igape achega ao convenio un 90% dos gastos xustificadas cun orzamento máximo de 443.700 €, o resumo das achegas de cada participante ao convenio é o seguinte:

Participante	Aportación
IGAPE	443.700
CFLOX	49.300
Total	493.000

CFLOX carece de ánimo de lucro na realización das actuacións obxecto do convenio, polo que a contribución pecuniaria responde a unha compensación dos gastos que terán que soportar de cara a lograr a efectividade e execución do convenio.

ANEXO II CERTIFICACIÓN DE GASTOS

CONVENIO		IGAPE-CFLOX "EIOLOG"						TITULAR:					
		DOCUMENTO XUSTIFICATIVO DO GASTO							DOCUMENTO DE PAGO				
Actuación	CONCEPTO	Nº FACT. / DOCUM	DATA	NOME DO PROVEDOR, PARTICIPANTE OU PERSOAL CFLOX	Descrición/ Concepto	IMPORTE TOTAL	Tarifa oficial para espazos na feira (€)	IMPORTE GASTOS IMPUTABLES AO CONVENIO	TIPO e Nº	DATA	IMPORTE	CONTA CARGO	ENTIDADE FINANCEIRA

Don/Dona _____ con NIF nº _____, actuando en nome e representación da entidade arriba indicada,

EXPÓN:

Que no período comprendido entre o _____ e o _____ incorreu e asumiu gastos que comprenden conceptos e importes atendibles no convenio de referencia por un importe de _____ euros. Os gastos pagados ou facturados reflíctense fielmente na contabilidade da empresa.

Que para a tramitación desta certificación de gastos presenta a documentación requirida no convenio.

DECLARA:

- Que os datos consignados nesta certificación son certos. A falsidade do declarado determinará a imposibilidade de percibir, de ser o caso, os dereitos recoñecidos no procedemento administrativo desde o momento en que se teña constancia da falsidade, sen prexuízo das responsabilidades penais, civís ou administrativas que procedan.



- Que a seguinte conta bancaria, da ca é titular a entidade de referencia, é a especificamente designada aos efectos de cobramento da contribución do Igape ", ao obxecto do convenio entre CFLOX e o Igape para a execución de actividades 2024-2026.

Entidade	Sucursal	D.C.	IBAN

- Que as copias dixitalizadas presentadas no expediente constitúen unha reprodución exacta dos seus orixinais.

E por todo iso,

SOLICITA:

Que lle sexa aboada á entidade arriba indicada o importe de _____ euros (*90% do importe anterior*), ingresándose conta bancaria anteriormente designada.

_____, _____ de _____ de _____
(Sinatura do/a representante)